

# तुबारि

**SAINT TECDHARAM**

ENGLISH MEDIUM SCHOOL  
**ADMISSIONS ARE STARTED.Ph.9418378712**  
**Discipline Smart work Quality education**  
 High qualified teachers with personal care  
 100% Results in annual exams 2010 with 97% above marks  
 Our students got first position in Dist Chamba and top  
 five positions at Pangi block in 5th class annual exams

पं ग वा डि मा सि क प त्रि का

## तुबारि संपादकीय टीम

◆ तुबारि संपादकीय टीम कनारा पंगेई सोभी गभुर जे जेन्के अम्ध्यान (ईन्तहान) शुरु भूण लगे से, तेन्ही जे हँ कनारा शुभ कामनाएं।

◆ इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पाणि घाटि अन्तर पढ़े जे इ पत्रिका शुरु किओ सि।

◆ तुबारि यक अवाणिज्यिक पत्रिका भो।

◆ तुबारि पत्रिका कोइ मेहणु, जनजाति, त संस्कृति जे गलति कडेण जे नेई छपाण लगे। अगर कोइ ई सोचता बि त अस जिम्मेबार नेई।

◆ छपाणे पहले सोभ आर्टिकल दुई टाई पांगेइ मेहणु हरालो असे। इ त खुलि बोक असि कि पैहेल बार पांगवाडि लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश करो।

◆ आर्टिकल्स ना मिलल, या घाटि मेहणु के मदद ना मिलल त तुबारि पत्रिका कदि बि बंद भुइ सकित।

◆ कोइ चिज छपां सि या नेई छपां जे तुबारि संपादकीय टीम पुरा अधिकार असा।

◆ अस सोभि पाणि मेहणु जे हात जोइ कई निवेदन कते कि, तुस बि कोइ अछा आर्टिकल, पुराणि या नौई कथा, कहावत, कविता, त नौवे घीत (पागवाडि अन्तर) लिख कइ छपां जे हँनदे दिए।

◆ अस किलाड केन्द्रीय पुस्तकालय, त बजार ठेके भैइ हरिरामे दुकान अन्तर तुबारि ड्रॉप बॉक्स पुठ बि अपु सझाव ओर आर्टिकल्स रखुं जे सुविधा किओ असि।

☎ 9418431531

☎ 9418429574

☎ 9418329200

☎ 9418411199

☎ 9418411599

## संबंध बधाणे त्यहार – जुकारु

पंगेई अन्तर सुआ त्यहार मनाते। जेन्ही अन्तर फुल्याट, दखेण, उनौणि, मिन्धलयाट, पारवाट, त जुकारु खास त्यहार असे। पर एन्हि अन्तर जुकारु त्यहार बडे धुमधाम जुओई मनान्ते। ए त्यहार चज्जि केआं पता जे अंवास एन्तु तिएस केआं शुरु भुन्ता त अंवास केआं पता जे पुर्नि एन्ता तिएस मुखि घेन्ता। चज्जि केआं पति अंवासे जे सिल्ह बोते। तिएस सल्ही कालैऊ खास भुन्तु। हर गी अन्तर खाणे-पीणे खरि-खरि चीजे बणान्ते त कुई-चिडि जे तेसे बंट रखते। तिएस भ्यागे पुजाई अन्तर अपु सोब पितर याद कते त तन्के नोऊ बुठ भियाडे गी जे आहार देन्ते। जेस अन्तर मणने, घी त चीणा भुन्ति। सल्हे ब्यादी बहल्लु केआं पहला बलराजाई पुजा कते। स्याणे मेहणु के बोलणे हेसाब जुओई, बडे पहले पंगेई त लोहुए जगाई अन्तर राजा बलिराजे राज चलताथ। जसे राज अन्तर एस जगाई अन्तर खाणे-पीणे, ढाडुड, गौरु, दुधे, घिउए कोई बि कमि ना भुन्तीथ। तउं त, सल्ही ब्यादी हर कोठि किनियेल बलराजा टगांते त तसे अगर घीउ, मणने, उन्ने, मले(सतु) टोओट, पाणी लोठ त फियुड छते।

लोहुए मेहणु बि तियेस यानि सल्ही ब्यादी बलिराजे पूजा कते। जुकारु मेला, जेस जे लोहुए मेहणु फागुडी बोते, से मेहणु अन्तर भाई चारा बधाणे कम कता। तिएस मेहणु अपफ केआं बोडे मेहणु के गी पथवारी घेइ कइ तेंके खुर बिन्ते त गडा-मेडा कते। साल अन्तर, जे बि मेहणु जेस जुओई बि झगडिए भुन्ता तिएस से तेसे गी घेइ कइ तेस जुओई गडा-मेडा कता त पुराणे सोब बोके बिसर छते।

जुकारु केआं पता पन्हेई शुरु भुन्ति। पन्हेई दिएस हर गी केआं मेहणु अम्पु बग घेंते। तिएस से बग बौज, आटे बकरा, आटे चूर, आटे हेटुड जंघलटी बुठ नेन्ते। तेन्हि आटे चूरे त हेटुड बई जंघलटी बग बौज फटाई कई बाणे शास्त्र पुरा कते। तिएस केआं खडि मेहणु अपु बघुई लाणे-बाणे कम बि शुरु कई सकते। पन्हेई कोई टियालेऊ त कोई पन्जालेऊ तिएस मनान्ते। पन्हेई तिएस जसे गी कुआ जमोऔ भुन्ता से बि अपु कुआ पन्हेई नेन्ते। कुआ पन्हेई नेणे खुशी अन्तर तेस ग्रां धाम देन्ते। बाहिंचाडि पन्हेई जे माँगल बोते। तिएस से मेहणु बि बग घेन्ते। से घी केआं बकरा, दहलुणु गडा त बग जे बौज वगैरा नेन्ते। भुटोरी अन्तर बि ऐ त्यहार भोट पन्हेई त जुकारु नोऊएं बठ मनाते। भुटोरी अन्तर मेहणु यक विशेष फियुड एस त्यहार जे लुन्गाणते। जेस जे जवराह बोते। मठड मेहणु पहला जवराहे फियुड जेठा मेहणु दे देन्ते, तउं तेसे आशिर्वाद नेन्ते। भोट पन्हेई अन्तर, बकरयाट, बटुडु, टोओटु खास जाठ बडीभारी जोर शोर जुओई मनान्ते। भोट पन्हेई केआं पता ऊयांण शुरु भोई घेन्ते। ऊयांण कलाड, धरोस त सुराल टाई जगाई भुन्ते। सियाणे मेहणु के केहणा असा कि जेठि नाग देवती के देहर असे, तेठि ऊयांण त जेठि देवी के देहर असे तेठि उनौणी मनान्ते।

ऊयांण त्यहार कलाड अन्तर खास मनान्ते। दशालेऊ तिएस नागे ऊयांण भुन्ता। तिएस कलाड महिलयथ भन्नार नागे पूजा कते। तेडया पता, ठाठिड त लागिड नागे देहर घेन्ते त तठिआ हडी छाबु फियुडु आणते। तन्हि पूरे टज्जे मेहणुके धे देन्ते त से अपु अपु गी जे नेन्ते। नागे ऊयांण केआं पता राजे ऊयाण भुन्ता। तेडया पता टज्जे ऊयांण तउं भराणि रथ भुन्ता, तिएस स्वांग बि भुन्ता। भराणे रथे राती नाग भुन्ता। जे प्रथा सिद कलाड टज्ज अन्तर असि। इस साल नाग करेल ग्रां अन्तर थिआ। ऐ नाग जुकारु भ्यागे जेस ग्रां भुन्ता तेस ग्रां नागे कोठि टगांते। तेठि पन्द्रा रोज टाई टेम नागे पूजा भुन्ति त टाई टेम नाग जे मणने के सिदयालि छते। भराणि रथे तिएस राति 27 नागएँत जेकि पूरे कलाडे भुन्ते से नागे कोठि ऐई कइ ब्यादी खाँते त पीन्ते। तेडया पता नाग तसे जगाई पठ पुजान्ते। इस हैसाब जुओई जुकारु त्योहार खत्म भोई घेन्ता। तउं त, ए त्यहार अंधकार केआं प्रकाशे कनाह त बुराई केआं अच्छाई कनाह नेणे कम कता।.... माहत्म, करेल।

## एचेलि नशे समस्या

कुछ रोज पेहले, अउं कुरेह जे घेण लगे थिआ। तेठि बथ मोउं कुछ मुको फिलउडे बोतुल मेए। मोउं लगु कि पक्का एसे गलत इस्तेमाल भोसा। पता धिक जांच पड़ताल कइ कइ मोउं पता लगा कि सचे ई पंगेई अन्तर एसे त होरे नशीलि चीजि के सुआ इस्तेमाल भुण लगे सा। ज्यादातर चौदा पन्द्रा साले खडि गभुर एसे जाल अन्तर फासण लगे से। से या त अपु दोस्ति के दवाव अन्तर या गीहे बाडि के दवाव अन्तर एई कइ या त दुखि भोइ कइ एसे इस्तेमाल करुं लगते। से फिलउड झिणे अन्तर छई कइ मुहँ त नक बइ शुघते। फिलउड, त भंग होरे नशीलि चीजि किआं बि सुआ खतरनाक भुन्ति। अगर एसे सुआ इस्तेमाल भुआ त


मेहणु झट मरि घेन्ते। जिखेई केआं एसे इस्तेमाल शुरु कते तिखेई केआं दिमाख, फेफड़े त बुकि खराब भुण लगते। एसे इस्तेमाल करणे बलि दिले धडकन कुटेमि भोई घेन्ते। त मेहणु टी लाल भोई घेन्ते, घेरा ऐण लगता त केहि केहि त हस्ते रेंहते। अगर एसे इस्तेमाल कते रेहेल त कुछ सालुं बाद, या त से मेहणु पागलि घेन्ते या मरि घेन्ते। एसे इस्तेमाल करुं बकत केहि केहि मरी घेन्ते। तस जे डाक्टर 'सडन स्त्रिफिंग डेथ सिन्ड्रोम' बोते। ([www.mayoclinic.com](http://www.mayoclinic.com))।स्टिफन डेवर्ड, जे कि शोधकर्ता भिंथ ई बोता कि सुआ ईया बोउ त मोटे मेहणु जे पता नैई कि ई चीज कतु खतरनाक भुन्ते। ए चीज सस्ते अन्तर गभुर मेति त इस्तेमाल करुं जे बि सुकतु भुन्तु। तऊं त गभुर एन्हि आदथि अन्तर झट पड़ते।

त ईया बोउ त मोटे मेहणु अपु गभुर के एस बारे खयाल रखं ऐन्ता। अगर गभुर होरे ई लगते, टि लाल भुन्ते, तेन्के कमरे त झिणिं केआं अराखे ई मुख एन्ति, परचेत भुन्ते या तेन्हि अन्तर कमजोरि केति त कमूं जे मरजि न बोति त ई बोउ तेस गभुर ध्यान रखूं जरुरि असा। ज्यादातर ईया बोउ ई सोचते कि हें कुआ कदि नशा न कता। पर बोक ई असि कि, सुआ गभुर अपु ईया बोउ पिठ पतुं नशा कते। तेन्हि पता न भुन्ता कि तेन्के गभुर नशा कते।

केहि बोते कि हें शरीर जे असा से भगवाने मन्दिर भिन्ता। त असि ए शरीर नशीली चिजी बलि खराब न करुं चाहिए। इस उमर अन्तर, क्योकि गभुर मन नाजुक भुन्ता त तेस जे ग्ये दी कइ या मडि कइ सुधारि न सकते। तेन्हि जरुरत असि हें प्यारे त प्यार जोई स्मझाणे। अगर अस तेन्हि जोई जबरदस्ति कते त से बिगिड घेन्ते। तऊं त, सोबि कियां पहले अपु गभुर पछांण जरुरि असि। से को घेन्ता, केस जोई मीता, कि खान्ता, केस जोई बिश्ता, कि कि कता एन्हि सोबि के बारे असि खयाल रखु चाहिए। त असि गभुर जोई ईया बोउए ई न त दोस्ती के ई व्यवहार करुं चाहिए। तऊं से असि केआं कुछ न नोकान्ते। जे गभुर नशा कता तेसे बलि गिहे बाडि परशानि भोई घेन्ते। नशा करणे बाडा त अपु नशे जोई कष्ट पान्ता पर गीहे बाडे परशान भोई कइ कष्ट पान्ते। एइये, अस आज कियां यक नशा मुक्त समाज बणाणे ब्योरा कते।

### कुछ खास खबर

- ◆ पंगेई टीण, लूज त सुराले 15 त 16 मार्च अन्तर, त करयासे 20, 21 त 22 मार्च अन्तर उनौणि मेला लगणे बाडा असा।
- ◆ घाटि अन्तर हियुते छुट्टी केआं पता सोब स्कूल 26 फरवरी केआं शुरु भोई गो से।
- ◆ हि.प्र. स्कूलि शिक्षा बोर्डे दशमि, ग्याहरबि त बाहरमि अम्ध्यान (ईन्तहान) 4 मार्च केआं शुरु भुण लगो से।



ADVERTISEMENT/ BEST WISHES FOR MARRIAGES, BITHDAYS, RETIREMENTS Etc. Please 9418429574



मनिश राणे शुरु किओ सा

# LONELY PLANET RESTAURANT

## AND HAWK HEIGH ADVENTURE

Beside CHC lab, Killar, Pangi 9418804701; 9418239677.



**Our specialties:-** Three room chambered restaurant for official parties, families, and privacy. Tasty, fresh and hygienic food is served. Specialized in Chinese and Kashmiri dishes. Maize roti, mutton sigroo and other local tasty dishes are also available.

एस रेस्टॉरन्ट पठ 2011 क्रिकेट विश्व कपे सिधा प्रसारण हेरे त अपु दोस्ति जोई पार्टि कइ के 5% छूटे\* फाइदा उठै।

We manage Trekking, Hiking, skiing, camping and company tours for tourists

*We undertake catering and party orders*

\*above Rs.500 bill